

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা
জাতীয় দৈনিকসমূহে প্রকাশিত সংবাদ, সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার
সংখ্যা ১৮৩/২০১৮-২০১৯
ঢাকা, রোববার ২৪ মার্চ ২০১৯, ১০ চৈত্র ১৪২৫

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে

- ১। মুক্তিযুদ্ধের চেতনায় সংবাদ পরিবেশনের আহ্বান স্পিকারের
- ২। পঞ্চম উপজেলা পরিষদ নির্বাচনের তৃতীয় ধাপে ১১৭ উপজেলায় ভোট আজ
- ৩। সিঙ্গাপুরের মাউন্ট এলিজাবেথ হাসপাতালে চিকিৎসাধীন সেতুমন্ত্রী ওবায়দুল কাদের সুস্থ আছেন
সেতুমন্ত্রী ওবায়দুল কাদেরকে দেখতে সিঙ্গাপুরের হাসপাতালে অর্থমন্ত্রী
- ৪। বিমানবন্দরে নিরাপত্তা আরও বাড়ানো হবে : স্বরাষ্ট্রমন্ত্রী
- ৫। গত ১০ বছরে দেশে ইলিশের উৎপাদন ৭৮ শতাংশ বৃদ্ধি পেয়েছে : শিক্ষামন্ত্রী
- ৬। এলডিসি থেকে উত্তরণ টেকসই করতে হবে : দক্ষিণ-দক্ষিণ সহযোগিতা সম্মেলনে পররাষ্ট্রমন্ত্রী
এস্তোনিয়ার প্রেসিডেন্ট ও আর্জেন্টিনার পররাষ্ট্রমন্ত্রীর সঙ্গে বৈঠক
- ৭। মানুষের কল্যাণে সবাইকে এগিয়ে আসতে হবে : বস্ত্র ও পাটমন্ত্রী
- ৮। কর্মসংস্থানের স্বার্থে পোশাকখাতকে বাঁচিয়ে রাখতে হবে : বাণিজ্যমন্ত্রী
- ৯। মানবাধিকার সমুল্লত রাখতে কাজ করছে সরকার : গৃহায়ন ও গণপূর্তমন্ত্রী
- ১০। ওআইসি'র সভায় ভূমিমন্ত্রীর সন্ত্রাস প্রতিরোধের আহ্বান
- ১১। স্থানীয় তথ্য প্রযুক্তিখাতের অগ্রগতি ডিজিটাল বাংলাদেশের মূল ভিত্তি : তথ্যপ্রযুক্তিমন্ত্রী
- ১২। আরব বিশ্বে বাংলাদেশের ভাবমূর্তি উজ্জ্বল করতে হবে : আবুধাবিতে শিক্ষা উপমন্ত্রী
- ১৩। ডাকসু'র দায়িত্ব গ্রহণ করলেন নবনির্বাচিতরা
- ১৪। শৃঙ্খলা ফেরাতে আজ থেকে সড়কে পুলিশের বিশেষ টিম : ডিএমপি কশিনার

১। মুক্তিযুদ্ধের চেতনায় সংবাদ পরিবেশনের আহ্বান স্পিকারের

স্পিকার ড. শিরীন শারমিন চৌধুরী মুক্তিযুদ্ধের চেতনা ধারণ করে নির্ভীকভাবে বক্তৃতিসংবাদ পরিবেশন করতে গণমাধ্যমের প্রতি আহ্বান জানিয়েছেন। গতকাল (২৩ মার্চ শনিবার) রাজধানীর বসুন্ধরা কনভেনশন সেন্টারে বাংলাদেশ প্রতিদিনের দশম প্রতিষ্ঠাবার্ষিকীর অনুষ্ঠানে প্রধান অতিথির বক্তব্যে তিনি এ আহ্বান জানান। স্পিকার ড. শিরীন শারমিন চৌধুরী বলেন, অবাধ তথ্যপ্রবাহের সুবর্ণ সময়ে অবস্থান করছে বাংলাদেশ। দেশে গণমাধ্যমের কর্মপরিধি ও কার্যপরিসর অনেক বিস্তৃত হয়েছে। তিনি আরও বলেন, গণমাধ্যম গণতন্ত্রকে সুসংহত করে। তিনি সংবাদ পরিবেশনের ক্ষেত্রে দায়িত্বশীল থেকে দক্ষতা বৃদ্ধির জন্য গণমাধ্যম কর্মীদের যত্নশীল হওয়ার পরামর্শ দেন। সূত্র : সংবাদ (শেষ পৃ.ক.১), ভোরের কাগজ (পৃ.৩,ক.৮), ডেইলি সান (শেষ পৃ.ক.২), নিউজ টুডে (পৃ.৩,ক.৫)।

২। পঞ্চম উপজেলা পরিষদ নির্বাচনের তৃতীয় ধাপে ১১৭ উপজেলায় ভোট আজ

দেশের ১১৭ উপজেলা পরিষদের নির্বাচন আজ (২৪ মার্চ রোববার)। এসব উপজেলায় সকাল ৮টা থেকে বিকেল ৪টা পর্যন্ত বিরতিহীন ভোটগ্রহণ চলবে। নির্বাচন কমিশন সূত্রে জানা গেছে, তৃতীয় ধাপে ১২৭টি উপজেলার তফসিল ঘোষণা করা হলেও এর মধ্যে ছয়টি উপজেলার সব পদে বিনা প্রতিদ্বন্দ্বিতায় নির্বাচিত হওয়ায় সেখানে ভোট হবে না। নির্বাচন কমিশন সচিব হেলালুদ্দীন আহমদ গতকাল (২৩ মার্চ শনিবার) রাজধানীর আগারগাঁওয়ে নির্বাচন ভবনের মিডিয়া সেন্টারে নির্বাচন-পূর্ব এক সংবাদসম্মেলনে বলেন, নির্বাচনি এলাকাগুলোতে সারাদিন খোঁজখবর নিয়েছি। যেখানে যেখানে নির্বাচনে অনিয়ম হওয়ার সম্ভাবনা আছে এবং আইনশৃঙ্খলা পরিস্থিতি অবনতির আশঙ্কা রয়েছে, সেসব উপজেলায় আমরা অতিরিক্ত বিজিবি ও ম্যাজিস্ট্রেট নিয়োগ করেছি। সূত্র : সংবাদ (পৃ.১,ক.৩), ইত্তেফাক (পৃ.১,ক.১), ডেইলি সান (শেষ পৃ.ক.৫), অবজারভার (পৃ.১,ক.১)।

৩। সিঙ্গাপুরের মাউন্ট এলিজাবেথ হাসপাতালে চিকিৎসাধীন সেতুমন্ত্রী ওবায়দুল কাদের সুস্থ আছেন

সেতুমন্ত্রী ওবায়দুল কাদেরকে দেখতে সিঙ্গাপুরের হাসপাতালে অর্থমন্ত্রী

সিঙ্গাপুরের মাউন্ট এলিজাবেথ হাসপাতালে চিকিৎসাধীন সড়ক পরিবহন ও সেতুমন্ত্রী ওবায়দুল কাদের শারীরিকভাবে সম্পূর্ণ সুস্থ আছেন। তাঁর এন্ডো ট্র্যাকিয়াল টিউব খুলে ফেলা হয়েছে এবং আস্তে আস্তে ঘুমের ওষুধ কমিয়ে আনা হচ্ছে। সিঙ্গাপুরে অবস্থানরত ওবায়দুল কাদেরের চিকিৎসা সমন্বয়ক বঙ্গবন্ধু শেখ মুজিব মেডিকেল বিশ্ববিদ্যালয়ের পরিচালক এবং নিওরোলজিস্ট অধ্যাপক ডা. আবু নাসের রিজভী গতকাল (২৩ মার্চ শনিবার) মেডিকেল বোর্ডকে উদ্ধৃত করে পরিবারের সদস্য ও অন্যদের এ তথ্য জানান।

এদিকে, সিঙ্গাপুরে চিকিৎসাধীন সেতুমন্ত্রী ওবায়দুল কাদেরকে দেখতে গত ২২ মার্চ শুক্রবার ঐ হাসপাতালে যান অর্থমন্ত্রী আ হ ম মুস্তফা কামাল। এ সময় তিনি ওবায়দুল কাদেরের শারীরিক অবস্থার খোঁজখবর নেন এবং পরিবারের সঙ্গে সময় কাটান। সূত্র-ইত্তেফাক (পৃ.১৫,ক.৪), জনকণ্ঠ (পৃ.১,ক.১), বণিক বার্তা (পৃ.২,ক.৮), ডেইলি সান (শেষ পৃ.ক.১), বাংলাদেশ টুডে (শেষ পৃ.ক.৫)।

৪। বিমানবন্দরে নিরাপত্তা আরও বাড়ানো হবে : স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জামান খাঁন কামাল জানিয়েছেন, বিমানবন্দরের নিরাপত্তা আরও বাড়ানো হবে। অস্ত্র নিয়ে যারা বিমানবন্দরে প্রবেশ করবেন, তাদের বিরুদ্ধে আইনি ব্যবস্থা নেওয়া হবে। গতকাল (২৩ মার্চ শনিবার) রাজধানীর মনিপুরীপাড়ায় নিজ বাসভবনে তেজগাঁও প্রাথমিক শিক্ষা পরিবার আয়োজিত অনুষ্ঠান শেষে সাংবাদিকদের এক প্রশ্নের জবাবে তিনি এসব কথা বলেন। স্বরাষ্ট্রমন্ত্রী আরো বলেন, প্রাথমিক শিক্ষাই হচ্ছে জীবন গড়ার মূল ভিত্তি। তাই প্রাথমিক শিক্ষার মাধ্যমে শিক্ষার্থীদের নৈতিকতা ও সামাজিক মূল্যবোধ সম্পর্কে সঠিক ধারণা দিতে হবে। প্রাথমিক শিক্ষাব্যবস্থা ও এর গুণগত মান উন্নয়নের ব্যাপারে প্রধানমন্ত্রী সচেতন রয়েছেন বলেই দেশের মানুষের শিক্ষার হার বাড়ছে। সূত্র : সংবাদ (শেষ পৃ.ক.৩), জনকণ্ঠ (পৃ.১,ক.১)।

৫। গত ১০ বছরে দেশে ইলিশের উৎপাদন ৭৮ শতাংশ বৃদ্ধি পেয়েছে : শিক্ষামন্ত্রী

শিক্ষামন্ত্রী ডা. দীপু মনি বলেছেন, ইলিশ বাংলাদেশের সর্ববৃহৎ একক মৎস্য প্রজাতি, যা বাংলাদেশের আর্থসামাজিক প্রেক্ষাপটে অত্যন্ত গুরুত্বপূর্ণ ও পুষ্টিগুণ সমৃদ্ধ একটি মাছ। বাংলাদেশ মৎস্য গবেষণা ইনস্টিটিউটের গবেষণা তথ্যের ভিত্তিতে দেশে জাটকা রক্ষার্থে ছয়টি অভয়াশ্রম ঘোষণা করা হয়েছে। সরকার নানামুখী পরিকল্পনা গ্রহণ

করায় গত ১০ বছরে ইলিশের উৎপাদন শতকরা ৭৮ ভাগ বৃদ্ধি পেয়েছে। এ বৃদ্ধির ধারা আমাদের অব্যাহত রাখতে হবে। তিনি গতকাল (২৩ মার্চ শনিবার) বাংলাদেশ মৎস্য গবেষণা ইনস্টিটিউট, মৎস্য ও প্রাণী সম্পদ মন্ত্রণালয়ের আয়োজনে চাঁদপুর জেলা শিল্পকলা একাডেমি মিলনায়তনে ‘ইলিশ উৎপাদন বৃদ্ধিতে অভয়াশ্রমের প্রভাব, মওজুদ নিরূপণ ও জাটকা সংরক্ষণে গবেষণা অগ্রগতি পর্যালোচনা’ শীর্ষক কর্মশালায় প্রধান অতিথির বক্তব্যে এসব কথা বলেন। সূত্র-ইত্তেফাক (পৃ. ৭, ক.৫), জনকণ্ঠ (পৃ. ১৪, ক.১)।

৬। এলডিসি থেকে উত্তরণ টেকসই করতে হবে : দক্ষিণ-দক্ষিণ সহযোগিতা সম্মেলনে পররাষ্ট্রমন্ত্রী এস্তোনিয়ার প্রেসিডেন্ট ও আর্জেন্টিনার পররাষ্ট্রমন্ত্রীর সঙ্গে বৈঠক

স্বল্পোন্নত দেশ (এলডিসি) থেকে উন্নয়নশীল দেশে উত্তরণ টেকসই করতে হবে। এ জন্য পারস্পরিক সহযোগিতা বাড়াতে হবে। আর্জেন্টিনার রাজধানী বুয়েস আয়ার্সে স্থানীয় সময় গত ২২ মার্চ শুক্রবার জাতিসংঘের দক্ষিণ-দক্ষিণ সহযোগিতা সম্মেলনের ফাঁকে এক পার্শ্ব বৈঠকে এ আহ্বান জানান পররাষ্ট্রমন্ত্রী ড. এ কে আব্দুল মোমেন। এছাড়া এস্তোনিয়ার প্রেসিডেন্ট কারসটি কালজুলেইডের সঙ্গে বৈঠক করেন পররাষ্ট্রমন্ত্রী। এ সময় বাংলাদেশের অগ্রগতি এবং দুই দেশের মধ্যে তথ্যপ্রযুক্তি, কারিগরি ক্ষেত্রে পারস্পরিক অভিজ্ঞতা বিনিময়ের বিষয়গুলো প্রাধান্য পায়। এদিকে আর্জেন্টিনার পররাষ্ট্র ও উপাসনালয়বিষয়ক মন্ত্রী জর্জ মারসেলো ফাউরির সঙ্গে দ্বিপক্ষীয় বৈঠক করেছেন ড. মোমেন। এ বৈঠকে ‘ফ্লেন্ডস অফ লিবারেশন ওয়ার অনার’ অ্যাওয়ার্ড পাওয়া আর্জেন্টিনার লেখিকা ভিক্টোরিয়া ওকাম্পো ১৯৭১ সালে মহান মুক্তিযুদ্ধে যেভাবে বাংলাদেশের পাশে দাঁড়িয়েছিলেন, তা স্মরণ করেন তিনি। এ সময় কৃষি ও কারিগরি ক্ষেত্রে পারস্পরিক সহযোগিতার বিষয়ে আগ্রহের কথা জানান আর্জেন্টিনার পররাষ্ট্রমন্ত্রী। সূত্র : সমকাল (পৃ. ২, ক.১)।

৭। মানুষের কল্যাণে সবাইকে এগিয়ে আসতে হবে : বস্ত্র ও পাটমন্ত্রী

বস্ত্র ও পাটমন্ত্রী গোলাম দস্তগীর গাজী বলেছেন, দেশের মানুষের কল্যাণে কাজ করতে সবাইকে এগিয়ে আসবে হবে। গতকাল (২৩ মার্চ শনিবার) নারায়ণগঞ্জের রূপগঞ্জ উপজেলার ভুলতার মিঠাবো এলাকায় মিঠাবো আদর্শ উচ্চ বিদ্যালয়ে বার্ষিক ক্রীড়া প্রতিযোগিতা ও পুরস্কার বিতরণী অনুষ্ঠানে প্রধান অতিথির বক্তব্যে তিনি এ কথা বলেন। প্রধানমন্ত্রী শেখ হাসিনার নেতৃত্বাধীন বর্তমান সরকারকে উন্নয়নমুখী শিক্ষাবান্ধব সরকার উল্লেখ করে তিনি বলেন, দেশের প্রতিটি শিক্ষা প্রতিষ্ঠানে নতুন নতুন ভবন হচ্ছে। সূত্র-যুগান্তর (পৃ. ১৬, ক.৮), সংবাদ (পৃ. ৪, ক.৬)।

৮। কর্মসংস্থানের স্বার্থে পোশাকখাতকে বাঁচিয়ে রাখতে হবে : বাণিজ্যমন্ত্রী

বাণিজ্যমন্ত্রী টিপু মুনশি বলেছেন, তৈরিপোশাক খাত দীর্ঘদিন ধরেই অনেক সমস্যা মোকাবিলা করছে। খাতটিকে বাঁচাতে অবশ্যই সরকারের সহযোগিতা নিতে হবে। গতকাল (২৩ মার্চ শনিবার) ফরিদপুরে তাঁর সম্মানে আয়োজিত এক সংবর্ধনা অনুষ্ঠানে এসব কথা বলেন বাণিজ্যমন্ত্রী। দেশের অর্থনীতিতে পোশাকখাতের অবদানের কথা মনে করিয়ে দিয়ে বাণিজ্যমন্ত্রী বলেন, ৪০ লাখ লোকের কর্মসংস্থান এবং ৮৩ শতাংশ রফতানি আয় আসে এ খাত থেকে। পোশাক কারাখানা মালিকদের জন্য নয়, বিশাল জনগোষ্ঠীর কর্মসংস্থান এবং রফতানি আয়ের স্বার্থে এ খাতকে বাঁচিয়ে রাখতে হবে। সূত্র : সমকাল (পৃ. ১৯, ক.১)।

৯। মানবাধিকার সমুন্নত রাখতে কাজ করছে সরকার : গৃহায়ন ও গণপূর্তমন্ত্রী

বাংলাদেশে মানবাধিকার সমুন্নত রাখতে সরকার অবিরাম কাজ করছে বলে মন্তব্য করেছেন গৃহায়ন ও গণপূর্তমন্ত্রী অ্যাডভোকেট শ. ম. রেজাউল করিম। তিনি বলেন, মানবাধিকারের বিষয়ে সোচ্চার ভূমিকা রাখার ক্ষেত্রে সরকারের ন্যূনতম কোনো বাধা নেই। আমরা সরকারের পক্ষ থেকে চাই একজন নাগরিকেরও মানবাধিকার যেন লঙ্ঘিত না হয়। এক্ষেত্রে সবাই সহায়তা দিতে প্রস্তুত। গতকাল (২৩ মার্চ শনিবার) রাজধানীর শাহবাগে জাতীয় জাদুঘরের প্রধান মিলনায়তনে মাসিক মানবাধিকার খবর এর সপ্তম প্রতিষ্ঠাবার্ষিকীর অনুষ্ঠানে প্রধান অতিথির বক্তৃতায় তিনি এসব কথা বলেন। সূত্র : সমকাল (পৃ. ৫, ক.৫), জনকণ্ঠ (শেষ পৃ, ক. ৭)।

=8=

১০। ওআইসি'র সভায় ভূমিমন্ত্রীর সন্ত্রাস প্রতিরোধের আহ্বান

বিশ্বব্যাপী সন্ত্রাস প্রতিরোধের আহ্বান জানিয়েছেন ভূমিমন্ত্রী সাইফুজ্জামান চৌধুরী। তুরস্কে গত ২২ মার্চ শুক্রবার ইসলামিক সম্মেলন সংস্থার (ওআইসি) পররাষ্ট্রমন্ত্রী পর্যায়ের নির্বাহী কমিটির জরুরি সভায় বাংলাদেশের পক্ষে অংশ নিয়ে তিনি এ আহ্বান জানান। নিউজিল্যান্ডের ক্রাইস্টচার্চে মসজিদে সন্ত্রাসী হামলার বিষয়ে অনুষ্ঠিত এ সভায় ভূমিমন্ত্রী সামাজিক, সাংস্কৃতিক, শিক্ষা এবং আইনি মাধ্যমে ইসলাম-বিদ্বেষ ও ইসলাম-ভীতির বিরুদ্ধে সম্মিলিত প্রতিরোধ গড়ে তোলারও আহ্বান জানান। ওআইসি'র মহাসচিব ড. ইউসেফ বিন আহমাদ আল ওথাইমেন এবং আমন্ত্রিত অতিথি হিসেবে নিউজিল্যান্ডের পররাষ্ট্রমন্ত্রী উইনস্টন পিটারস সভায় উপস্থিত ছিলেন। সূত্র-যুগান্তর (শেষ পৃ, ক.১), ভোরের কাগজ (পৃ. ৩, ক.১), নিউজ টুডে (পৃ. ২, ক.৫)।

১১। স্থানীয় তথ্য প্রযুক্তিখাতের অগ্রগতি ডিজিটাল বাংলাদেশের মূল ভিত্তি : তথ্যপ্রযুক্তিমন্ত্রী

ডাক, টেলিযোগাযোগ ও তথ্যপ্রযুক্তিমন্ত্রী মোস্তাফা জব্বার বলেছেন, দেশীয় সফটওয়্যার নির্মাতাদের জন্য বেসিস সফট এর্সপো এ অঞ্চলের সর্ববৃহৎ একটি প্ল্যাটফর্ম। স্থানীয় তথ্য প্রযুক্তিখাতের অগ্রগতি ডিজিটাল বাংলাদেশের মূল ভিত্তি। ডিজিটাল বাংলাদেশের স্বপ্ন বাস্তবায়িত হচ্ছে স্থানীয় তথ্য প্রযুক্তিখাতের নিরলস অবদানের কারণেই। বেসিস সফট এর্সপো স্থানীয় তথ্যপ্রযুক্তি প্রতিষ্ঠানের সক্ষমতা তুলে ধরেছে। সরকারি-বেসরকারি খাতে দেশি সফটওয়্যারের গুণগত আর কৌশলগত মান তুলে ধরতে বেসিস কাজ করে যাবে বলেও দৃঢ় আশাবাদ ব্যক্ত করেন তিনি। গতকাল (২৩ মার্চ শনিবার) তিনদিন ব্যাপী ‘বেসিস সফট এর্সপো ২০১৯’এর সমাপনী অনুষ্ঠানে তিনি এসব কথা বলেন। সূত্র-ইত্তেফাক (পৃ.১৩,ক.১), ভোরের কাগজ (পৃ.৯,ক.৬)।

১২। আরব বিশ্বে বাংলাদেশের ভাবমূর্তি উজ্জ্বল করতে হবে : আবুধাবিতে শিক্ষা উপমন্ত্রী

সংযুক্ত আরব আমিরাতের রাজধানী আবুধাবিতে প্রবাসীদের সঙ্গে মতবিনিময় সভায় শিক্ষা উপমন্ত্রী মহিবুল হাসান চৌধুরী নওফেল বলেছেন, পশ্চিমা বিশ্বে যেভাবে বাংলাদেশের ভাবমূর্তি উজ্জ্বল হয়েছে, সেভাবে আরব বিশ্বেও ভাবমূর্তি উজ্জ্বল করতে হবে। বিশেষ করে সংযুক্ত আরব আমিরাতের দিকে বেশি নজর দিতে হবে। গত ২২ মার্চ শুক্রবার আবুধাবি কেন্দ্রীয় বঙ্গবন্ধু পরিষদের উদ্যোগে আয়োজিত মতবিনিময় সভার প্রধান অতিথির বক্তব্যে তিনি এ কথা বলেন। শিক্ষা উপমন্ত্রী বলেন, আরব আমিরাত তাদের শিক্ষার প্রসারে এডুকেশন সিটি করেছে। সেখানে বাংলাদেশের শিক্ষকরা যাতে এসে পড়াতে পারেন সেদিকে লক্ষ্য রাখতে হবে। সূত্র : সমকাল (পৃ.৫,ক.৬)।

১৩। ডাকসু’র দায়িত্ব গ্রহণ করলেন নবনির্বাচিতরা

কার্যনির্বাহী পরিষদের প্রথম সভা অনুষ্ঠানের মধ্য দিয়ে সচল হলো দেশের দ্বিতীয় পার্লামেন্ট হিসেবে খ্যাত ঢাকা বিশ্ববিদ্যালয় কেন্দ্রীয় ছাত্র সংসদ (ডাকসু)। এ সভার মাধ্যমে ডাকসু’র দায়িত্ব গ্রহণ করেছেন সহ-সভাপতি নুরুল হক নুর, সাধারণ সম্পাদক গোলাম রাব্বানী, এজিএস সাদ্দাম হোসেনসহ নবনির্বাচিত কার্যনির্বাহী কমিটি। গতকাল (২৩ মার্চ শনিবার) ডাকসু’র কার্যনির্বাহী কমিটির প্রথম সভাশেষে তাঁরা দায়িত্ব গ্রহণ করেন। উক্ত সভায় সভাপতিত্ব করেন ডাকসু’র সভাপতি ও ঢাকা বিশ্ববিদ্যালয়ের উপাচার্য ড. মো. আখতারুজ্জামান। সূত্র : সংবাদ (পৃ.১,ক.৭), যুগান্তর (পৃ.১,ক.৫), ডেইলি সান (পৃ.১,ক.২), ইন্ডিপেনডেন্ট (পৃ.১,ক.৪)।

১৪। শৃঙ্খলা ফেরাতে আজ থেকে সড়কে পুলিশের বিশেষ টিম : ডিএমপি কিশিনার

ঢাকা মেট্রোপলিটন পুলিশের (ডিএমপি) কমিশনার আসাদুজ্জামান মিয়া বলেছেন, পরিবহনখাতে শৃঙ্খলা ফেরাতে আজ (২৪ মার্চ রোববার) থেকে রাজধানীর প্রতিটি ইন্টারসেকশন রুটে পুলিশের বিশেষ টিম নামানো হবে। বিশেষ এ টিম আগামী সাত দিন সড়কে চলাচলকারী পরিবহন কোম্পানিগুলোর প্রতিযোগিতা রোধ, যত্রতত্র দাঁড়িয়ে যাত্রী ওঠানামা ও কৃত্রিম যানজট সৃষ্টিকারীদের বিরুদ্ধে ব্যবস্থা নিতে সোচ্চার থাকবে। গতকাল (২৩ মার্চ শনিবার) ডেমরার মাতুয়াইলের সামছুল হক স্কুল অ্যান্ড কলেজ প্রাঙ্গণে মাদক, সন্ত্রাস ও জঙ্গিবাদবিরোধী শিক্ষার্থী-অভিভাবক সমাবেশে প্রধান অতিথির বক্তব্যে তিনি এসব কথা বলেন। সূত্র-ইত্তেফাক (পৃ.৩,ক.২), সমকাল (শেষ পৃ,ক.৪), নিউ নেশন (শেষ পৃ,ক.৮), বাংলাদেশ টুডে (পৃ.১,ক.৫)।

=৫=

সম্পাদকীয়

- ক. সমকাল : কিশোরগঞ্জের বিভিন্ন ফার্মেসিতে মেয়াদোত্তীর্ণ ওষুধ বিক্রি হচ্ছে এক প্রতিবেদনে তা প্রকাশিত হওয়ার কথা উল্লেখ করে সারাদেশে বিভিন্ন জায়গায় মেয়াদোত্তীর্ণ ওষুধ বিক্রয় বন্ধে কঠোর ব্যবস্থা নেওয়ার দাবি।
- খ. ইত্তেফাক : অতিরিক্ত বই, খাতা ও পরীক্ষা গ্রহণের মাধ্যমে প্রাথমিক স্তরের শিক্ষার্থী ও অভিভাবকদের ওপর চাপ প্রয়োগ করা হয় এ অভিযোগ আমলে নিয়ে শিশুদের স্বাভাবিক বিকাশের স্বার্থে প্রাথমিক শিক্ষা বাড়তি চাপ ও ভারমুক্ত করার সুপারিশ।
- গ. ইনকিলাব : সাতক্ষীরা ও বাগেরহাটের উপকূলীয় এলাকায় প্রায় ২২৯২ কিলোমিটার বেড়িবাঁধের মধ্যে ৪২৪ কিলোমিটার ঝুঁকিপূর্ণ উল্লেখ করে সারাদেশের ঝুঁকিপূর্ণ বেড়িবাঁধগুলো সংস্কারের ওপর গুরুত্বারোপ।
- ঘ. যায়যায়দিন : বর্তমান সরকারের সাহসী উদ্যোগ ও আন্তরিক প্রচেষ্টায় পদ্মাসেতু বাস্তবায়ন কাজ এগিয়ে যাচ্ছে উল্লেখ করে দ্রুত সেতুর কাজ সম্পন্ন করা হবে বলে প্রত্যাশা ব্যক্ত।
- ঙ. সংবাদ, যুগান্তর : সড়কে শৃঙ্খলা প্রতিষ্ঠা করতে বেপরোয়া গাড়িচালকদের নিয়ন্ত্রণ, ত্রুটিপূর্ণ যানবাহন অপসারণের পাশাপাশি জনগণকে ট্রাফিক আইন সম্পর্কে সচেতন করার আহ্বান।
- চ. ডেইলি সান : দখল ও দূষণের কবল হতে রাজধানীর নদীগুলো সুরক্ষায় দৃষ্টি দেওয়ার সুপারিশ।
- ছ. নিউ নেশন : যাত্রীসেবার মান বাড়াতে রেলের উন্নয়নে এবং দুর্নীতি দমনে কার্যকর পদক্ষেপ নেওয়ার ওপর

গুরুত্বারোপ।

উপসম্পাদকীয়

মানবকণ্ঠ পত্রিকায় প্রকাশিত কলামে উল্লেখ করা হয়েছে, কৃষির উন্নয়নে পরিকল্পিত চাষাবাদের পাশাপাশি উৎপাদিত কৃষিপণ্যের ন্যায্যমূল্য নিশ্চিত করতে হবে।

নিবন্ধ ও ফিচার

ইনকিলাব পত্রিকায় প্রকাশিত 'নিরাপদ খাদ্যের বিকল্প নেই' শিরোনামের নিবন্ধে উল্লেখ করা হয়েছে, নিরাপদ খাদ্য আইন ২০১৩ এর বাস্তবায়নের পাশাপাশি নাগরিক উদ্যোগে ভেজালের বিরুদ্ধে সামাজিক আন্দোলন গড়ে তোলা জরুরি।

#

ফাহিমা/মরজিনা/সাইদা/রশীদ/মাসুম/২০১৯/৯.০০ঘন্টা